

77. Invertimus proinde κατὰ βίαιον argumētum : sic colligentes : Non ea quæ ejusdem, sed quæ diversissimarum sunt naturarum, sibi invicem opponuntur. Ergò Cælum & terra, quæ sibi invicem in scriptura opponuntur : non ejusdem sed diversissimarum erunt naturarum, ac proinde Cælum corporeum esse nequit.

78. Adde quod cælum disertè nominatur thronus DEI, in his ipsis locis, quibus isthæc Cæli & Terra continetur oppositio: Iam si Cælum erit corporeum, consequens fuerit, ipsum thronum DEI esse corporeum.

79. Sed quid mirum si vel maximè Iesuita noster tantopere delectetur Cælo corporeo, cum sine dubio didicerit ex prædecessoribus suis Scholasticis doctoribus, ac cum primis Bernhardino & Roseto, in cælo hoc corporeo beatos instituturos choreas & saltationes. Quemadmodum Iohannes Geiler Keiserbergius in quadam concione duodecim recenset requisita, quæ ad choreas commodè ducendas pertineant: Quæ cum in cælo isto corporeo vel maximè reperiantur, ideoque vero simile videri statuit, in cælo isto futuras choreas, saltationes & id genus alias gesticulationes. Tale ergo cælum expectet Iesuita, quo cum tota maleferiata sua societate verè est dignus; Nobis cæli hujus corporei partem nullam exoptamus.

SACRA-